

lebroient les Florales, en memoire de la courtisane Flora, qui fut tant aymee par Pompee, & laissa le peuple Romain heritier de tout son bien; sa maison estoit ou est a present le campo di Fiore, ainsy nommè de son nom, & ses ieux aultresfois se souloient celebrer au dessus de la vigne du Cardinal de Ferrare aux piedz de Montecauallo, ou l'on voit la vallee enclose de murailles pour les courtisanes nues, qui accôpagnoient de paroles deshonestes, & effrenees, leurs mouuementz & gestes lascifz. Et le 6. dudict mois les cheualiers alloient pompeusement vestuz, portant dans leurs mains dextres des rameaux d'oliuier despuis le temple de Mars, qui estoit in via Appia loing de Rome quatre milles, iusques a cel uy de Castor, & Pollux, en memoire de la victoire obtenue cõtre les Latins. le 29. de May escheoient les lustres qu'on festoyoit a l'honneur de Mars monstrant les trompettes, les Aigles, & aultres enseignes militaires. l'Automne ilz celebroyent les festes en l'honneur de Bacchus: & le mois de Decèbre les Saturnales en honneur de Saturne. Ilz souloient aussy celebrer les ieux de Traian, les Capitolins, les Sceniques, les Apollinaires, les seculiers, les Romains, les plebees, les Circenses, & d'aultres, que ie laisse pour n'estre trop long.

Du Sepulcre d'Auguste, d'Adrian, & de Septimius.

LE Sepulchre d'Auguste estoit en la vallee Martia, ou l'on en voit des vestiges encor auprès de l'Eglise de s. Roch. Il estoit ornè de beau marbre blanc, de porphyre, de grandes colomnes, obelisques, & tresbelles statues, & a uoit douze portes & trois enclos de murailles, il estoit de forme ronde, & de 150. coudees de haulteur. Au sommet d'iceluy estoit la statue d'Auguste faiète d'airain. Iceluy le fit bastir non pour luy seulement mais aussy pour les aultres Empereurs. Celuy d'Adrian estoit ou est le chasteau s. Ange, embelly, & diuersifiè de beaux marbres, statues, hommes, cheuaux, & chars artificieusement faietz, qui furent ruinèz par les soldatz de Bellifaire, durant la guerre des Gothz. Boniface VIII. y fit faire le chasteau, qu'Alexandre VI. ceignit, & entoura de fossèz & de bastions, & munit de gardes, y faisant faire la galerie couuerte, & descouuerte, qui va iusques au palais de s. Pierre, & Paul III. embellit de belles chambres, & habitations. Celuy de Septimius Seuerus estoit proche a l'Eglise de s. Gregoire, & fut appellee Septizonium de sept soliveaux, qui y estoient l'un sur l'autre.